

Ishak GERGIĆ,  
pomoćnik ministra za industriju u Vladi Tuzlanskog kantona

# POVEĆAN PLASMAN NA INOTRŽIŠTE ZA 102%



Foto: Ahmed Bajrić - Blicko

Za prvih šest mjeseci ove godine industrija Tuzlanskog kantona bilježi manji izvoz za 14,5% u odnosu na isti period od prije dvije godine. Međutim, u odnosu na 2009. preduzeća iz oblasti industrije, energetike i rudarstva bilježe povećanje izvoza za 52%. Ministarstvo industrije, energetike i rudarstva ovog kantona u 2009. godini obezbijedilo je kreditna sredstva u visini od 5.500.000,00 KM bez kamata za podršku privrednim subjektima, u cilju novog zapošljavanja

Prema podacima iz Ministarstva za industriju, energetiku i rudarstvo Tuzlanskog kantona, u prvoj polovici 2010. godine izvoz je u odnosu na prethodnu godinu povećan za više od 50%, a samo u industrijskom sektoru za više od 100%. To upućuje na to da su nakon borbe sa svjetskom ekonomskom krizom pojedine firme došle, a neke još uvijek idu ka stabilizaciji proizvodnje i tržišta. Pomoćnik ministra za industriju Tuzlanskog kantona Ishak Gergić za Poslovne novine iznosi podatke o izvozno-uvoznim rezultati-

ma, koji su rađeni na bazi 44 privredna subjekta.

**Tuzlanski kanton zauzima značajno mjesto u ukupnom izvozu BiH, odnosno Federacije BiH. Kakvi su rezultati postignuti u oblasti industrije, energetike i rudarstva?**

- Može se konstatovati da su preduzeća iz resorne oblasti zabilježila povećanje izvoza u prvih šest mjeseci ove godine, u odnosu na isti period prošle godine. Ostvareni izvoz u prvoj polovini godine iznosi 318,69 mili-

ona KM i veći je za 52% od ostvarenog izvoza u prvoj polovini prošle godine. Na ovakve rezultate uticalo je, prije svega, povećanje izvoza u sektoru industrije za 102% u odnosu na isti period prošle godine. Što se tiče grana industrije, najveće povećanje zabilježeno je u okviru hemijske industrije gdje je ostvareno povećanje izvoza od 238%, metaloprerađivačka i elektroindustrija je ostvarila povećanja izvoza za 18%, industrija obuće i tekstila je ostvarila smanjenje za 34%, ali je, ipak, ostvarila pozitivan





neto izvozni rezultat od 6.252.477,00 KM. Industrija građevinskog materijala i građevinarstva, takođe, je zabilježila pad izvoza od 48%. Za razliku od sektora industrije gdje je zabilježen rast izvoza, u sektoru energetike izvoz je smanjen za 50% u odnosu na isti period prošle godine, dok je u rudarstvu ostvareno povećanje izvoza za 27%. Uvoz je, takođe, povećan za 85% u odnosu na isti period 2009. godine. Značajno povećanje uvoza zabilježeno je u metaloprerađivačkoj i elektroindustriji, rudarstvu, hemijskoj industriji. U industriji građevinskog materijala ostvareno je smanjenje uvoza. Ukupno ostvareni neto izvozni rezultat (izvoz – uvoz) na nivou resorne oblasti iznosio je 116.220.770,00 KM. Ovaj izvještaj je rađen na bazi 44 privredna društva, koja su nam dostavila te podatke. Međutim, privatne firme nam ih nisu dužne dostavljati.

**Ko su najveći izvoznici po resornim oblastima?**

- U sektoru rudarstva najveći izvoznici su Rudnici uglja „Banovići“ u Banovićima sa ostvarenim izvozom za prvih šest mjeseci ove godine od 5.475.777,00 KM, a u sektoru energetike Termoelektrana Tuzla sa izvozom od 33.442.515,00 KM. U sektoru industrije najveći izvoznik je „GIKIL“ Lukavac, koji je u prvih šest mjeseci ostvario izvoz u iznosu od 144.727.710,00 KM, slijedi „CIMOS TMDAi“ Gradačac sa 56.177.461,00 izvoza, zatim „Sisecam soda“ Luka-

vac sa 38.157.221,00 KM, „Alfe Mi“ Živinice sa 7.677.178,00 KM, „UNIS TOK“ Kalesija sa 5.975.385,00 KM, „Solana“ Tuzla sa 5.826.960,00 KM, TTU Tuzla sa izvozom od 4.592.738,00, Modna konfekcija „Kula“ Gradačac sa 3.206.067,00 KM, Fabrika cementa Lukavac sa 2.153.865,00 KM, „Remontmontaža“ sa 2.037.825,00 KM.

**Koliko je globalna ekonomska kriza uticala na izvoz s područja Tuzlanskog kantona u proteklih godinu, dvije?**

- Ukupno ostvareni izvoz resorne oblasti za prvih šest mjeseci 2008. godine je bio 372.850.849,00, a ukupno ostvareni izvoz za isti period dvije godine kasnije 14,5 % manje. Primjera radi, u prvih šest mjeseci ove godine preduzeća iz resorne oblasti zabilježila su povećanje izvoza, u odnosu na 2009. godinu za 52%.

**Šta je Tuzlanski kanton, odnosno Ministarstvo industrije, energetike i rudarstva učinilo u smislu podrške privrednim subjektima?**

- Ministarstvo industrije, energetike i rudarstva u smislu podrške privrednim subjektima je u 2009. godini obezbijedilo kreditna sredstva u visini od 5.500.000,00 KM bez kamata, u cilju novog zapošljavanja. Osim ove aktivnosti Ministarstvo je u kontinuitetu nastojalo da zadrži sva radna mjesta u privrednim subjektima sa većinskim državnim kapitalom u kojima nije izvršena privatizacija ili je bila neuspješna.

**Strategijom razvoja predviđeno je da se TK profilira kao moderna, konkurentna, evropski orijentisana regija sa snažnim poduzetništvom. Kakva je izvozna strategija?**

- Kada je u pitanju izvoz, u narednom periodu očekujemo proširenje kapaciteta u energetskom sektoru izgradnjom bloka 7 u Termoelektrani Tuzla, kao i izgradnjom termoelektrane u Banovićima.

**S. NIKOLIĆ**

